



冊桌仔

查某囡仔對愛情的幻想是天性，相信每一個人濟少攏捌想過家己穿新娘衫的模樣。講著欲恰心愛的人建立新的家庭，是又閣歡喜、又閣期待。

結婚的日子已經看好矣，最近開始咧規劃恰籌備。毋但愛決定婚禮的場所、試穿新娘衫、討論彼工的行程，閣愛整理物件。想著欲離開父母的身軀邊，心肝內煞有淡薄仔毋甘。

行到冊桌仔邊，準備欲共桌頂 li-li-khok-khok 的物件清清咧。較早遮的攏是我家己布置的，雄雄看著一張鉸甲四四角角的報紙，予我想起囡仔時代的點點滴滴，目箍煞紅起來、目屎嘛擋袂牢輾落來。

細漢，厝裡真散赤閣有貸款的壓力，父母千叮嚀萬交代叫阮愛勤儉，毋才，真濟物件攏是拈大漢的用過的。親像我攏拈阿姊穿過的衫仔褲、鞋仔恰文具。若無誠要緊、誠需要，是無可能閣加開錢買新的。

欲升國中彼年，我共阿爸講冊桌仔傷低、傷細塊，足歹坐的，敢會當買新的？阿爸講無冗剩錢，毋過伊答應欲替我釘一塊冊桌仔。我暢甲規個人跳起來！猶會記得頭一擺坐佇冊桌仔頭前整理的情景，布疋仔、鏡、影歌星的剪報，一項一項沓沓仔排、勻勻仔囡予好勢，親手布置屬我家己的空間，心情是遐爾仔歡喜。

自從有這塊桌仔，逐工放學轉來，我攏屈佇遐享受這個私密的空間。偷偷仔共恁講喔，到今我猶相信有一種魔力，見擺若是坐佇冊桌仔頭前，就會有敢若『Superman』的能力，會當完成所有的代誌。考牢大學進前，遐就是我的秘密基地，無論歡喜、悲傷，攏是伊陪我度過彼段辛苦讀冊的日子，阮的感情講有佻深就有佻深。

整理到一半，厝仔底彼張反黃的相片，予我想起較早雖然散赤，毋過，日子是遐爾快樂。相片內面的阿爸阿母足少年，本來叫是會當永遠陪佇佢的身軀邊，無疑悟歲月無情，這馬個的面已經全皺痕，啊我嘛咧欲行入禮堂矣。進前明明有遐濟時間通陪伴佢、做伙享受天倫之樂，我煞毋知影好好仔把握，這陣才來後悔已經袂赴矣！

作者：呂文茹

☆詞彙學習☆

【目箍】bák-khoo：眼眶。

【散赤】sàn-tshiah：貧窮、窮困。缺乏錢財，生活拮据困乏。

【毋才】m̄-tsiah：……才……。

【暢】thiong：高興雀躍的樣子。

【勻勻仔】ûn-ûn-á：慢慢地、謹慎小心地。

【屈】khut：彎著身子、曲著身子。

【見擺】kiàn-pái：每次。意指同樣的狀況經常性的發生。

【少年】siàu-liân：年紀輕。

【無疑悟】bô-gî-ngōo：又唸作 bô-gî-gōo。不料、想不到。

【皺痕】jiâu-hûn/liâu-hûn：皺紋。指人體皮膚上或物體表面上的摺痕。